

北邊備對

河朔訪古記

冀越通

興復哈密記



河朔訪古記

納新撰

中華書局

四庫全書提要

河朔訪古記二卷。不著撰人名氏。明焦竑國史經籍志著錄。亦不云誰作。考元劉仁本羽庭集有是書序。曰今翰林國史院編修官郭囉洛氏納新。案郭囉洛、原作葛邏祿、納新、原作迺賢、今改正。易之。自其先世徙居鄆。至正五年。挈行李出浙渡淮。溯大河而濟。歷齊魯陳蔡晉魏燕趙之墟。弔古山川城郭。邱陵宮室。王霸人物。衣冠文獻。陳迹故事。暨近代金宋戰爭。疆場更變者。或得於圖經地志。或聞諸故老舊家。流風遺俗。一皆考訂。夜還旅邸。筆之於書。又以其感觸興懷慷慨激烈成詩歌者。繼之。總而名曰河朔訪古記。凡一十六卷云云。則此書實納新作。焦氏考之未審。序稱十六卷。焦氏作十二卷。亦誤也。納新族出西北郭囉洛。因為氏。郭囉洛者。以欽定西域圖志考之。即今塔爾巴哈台也。元時色目諸人散處天下。故納新寓居南陽。後移於鄆縣。初辟為浙東東湖書院山長。以薦授翰林編修官。出參桑戩實哩。原作桑前失里、今改正。軍事卒於軍。所著金臺集。尚有刊本。惟此書久軼。今散見永樂大典中者。惟一百三十四條。所紀皆在真定河南境內。而其餘不存。又仁本所稱繼以詩歌者。亦不復可見。然據今所存諸條。其山川古蹟。多向來地志所未詳。而金石遺文言之尤悉。皆可以為考證之助。謹彙而編之。核其道里疆界。各以類從。真定路為一卷。河南路為一卷。仍錄劉仁本原序冠之。雖殘缺之餘。十存一二。而崖略宛在。條理可尋。講輿地之學者。猶可多所取資焉。

河朔訪古記卷上

元納新撰 金山錢熙祚錫之校

常山郡部

常山郡部真定路。禹貢冀州之域。春秋鮮虞之地。晉滅之。戰國屬趙。秦爲鉅鹿郡地。漢初置恆山郡。避文帝名。改常山郡。屬真定國。晉仍爲常山郡。魏因之。徙今治。後周立恆州。隋復爲恆山郡。唐初曰恆州。天寶改常山郡。又改平山郡。尋復常山。元和避穆宗諱。改鎮州。升成德軍。五代梁曰武順軍。晉曰順德軍。漢曰成德軍。周及宋皆因之。宋尋改真定府。爲河北重鎮。金因之。置河北西路。國朝初仍爲河北西路。懷、衛、邢、洛、磁、相、保、大名、河間、皆隸焉。後改真定路總管府。領縣九。曰真定。○案真定下。原本。行曰字。今刪。欒城、元氏、靈壽、獲鹿、平山、阜平、藁城、涉縣。領府一。曰中山。領州五。曰冀、深、蠡、晉、趙。府州所鎮縣。凡二十有一。真定路錄事司。國朝所建立。專理城內。城之外。則真定縣所理。城中今置燕南河北道肅政廉訪使。及真定路總管府以鎮之。錄事司。真定縣二官署。皆在城中。

漢高祖攻陳豨。改曰真定。魏爲常山郡治。故城今在縣南。元魏移郡治於府城中。隋廢郡。唐復爲真定縣。屬鎮州。宋金因之。屬真定府。國朝爲真定路倚郭。

藁城縣。戰國趙武靈王爲九門縣。漢爲藁城。屬真定。九門屬常山。晉省藁城。北齊置鉅鹿郡。省九門。唐置

廉州。復改葦城。州尋廢。又置九門縣。曰觀州。州亦廢。並屬鎮州。天祐置葦平縣。宋置葦城。省九門入焉。開寶三年廢。金復置。國朝因之。屬眞定路。

樂城縣。春秋晉靖公孫賓食邑。賓因以樂爲氏。西漢爲關縣。卽今治也。東漢爲樂城縣。故城在趙州西北十六里。今曰輪城。是也。晉省。後魏復置。隋置樂州。尋廢。唐改樂氏。屬趙州。後屬眞定。宋爲樂城。金因之。國朝爲眞定路屬縣。

中山府城。古中山。唐堯始封此。禹貢爲冀州之城。春秋鮮虞國也。初爲中山。魏并之。秦爲上谷、鉅鹿二郡。地。漢置中山國。治盧奴。後燕慕容垂都此。魏爲中山郡。隋爲博陵郡。尋改高陽。唐爲定州。又復改博陵郡。升義武軍。宋改定武軍。升中山府。中山郡。金仍爲中山府。國朝因之。爲中山府。隸眞定路。領縣三。曰安喜。爲附郭縣。曰新樂。曰無極。

安喜縣。春秋鮮虞之地。戰國爲中山。魏文侯使樂羊取之。以封太子。至漢爲盧奴。苦陘二縣之地。東漢爲漢昌縣。魏改魏昌。元魏立安州。尋改定州。北齊遷安喜於今治。隋廢安喜。屬博陵郡。尋置鮮虞縣。唐復爲安喜。宋金因之。國朝以安喜爲中山府倚郭縣。兼理城中。

趙州城中。禹貢冀州之城。春秋屬晉。戰國屬趙。秦屬邯鄲郡。漢屬恆山、鉅鹿二郡地。晉爲趙國。北魏爲趙郡。兼置殷州。理象城。北齊爲趙州。隋改樂州。尋爲趙郡。唐復爲樂州。尋改趙州。又爲趙郡。屬河北道。宋初仍爲趙州。崇寧中。升慶源軍。尋升慶源府。金天德三年。改沃州。因與趙音同。又取以水沃火之義。云國朝

復爲趙州。隸京定路。領縣七。曰平棘。爲附郭縣。曰寧晉。曰臨城。曰高邑。曰柏鄉。曰隆平。曰贊皇。平棘縣。漢初屬常山郡。後置宋子縣。晉屬趙國。後魏爲趙郡治所。後置宋子縣。隋自象城移趙州治此。改置平棘縣。唐宋金皆因之。國朝爲趙州屬縣。倚郭縣。兼理城中。

管仲曰。鄆邑之黍。春秋納荀寅于柏人。鄆爲晉邑。柏鄉卽柏人。今治卽鄆邑也。漢屬鉅鹿郡。高祖八年。次柏人。趙相貫高謀殺上。上心動。問縣名。柏人。上曰。柏人者。迫於人也。去弗宿。卽此地也。光武卽位于縣之五成陌千秋亭。更名高邑。爲冀州刺史治所。魏改柏仁。隋置柏鄉縣於彭水之陰。卽今治也。唐因之。屬趙州。天寶改堯山縣。宋省柏鄉入高邑。而存堯山。金復爲柏鄉。屬沃州。國朝因之。爲趙州屬縣云。

元氏縣西北三十餘里。曰封龍山。星文圖曰。山應軒轅十星。屈折若飛龍之狀。故云。山陽有龍首峯。高二百丈。上有立石數莖。望之若龍骨也。峯東北五里。又有獅子峯。高三百丈。若獅子蹲踞。又有熊耳峯。高五百丈。又有玉石峯。螺峯。南北天井。皆西北最高之峯。各以其形相類而名也。又有石人峯。在東南隅。三石相向屹立。各高三四丈。儼如人形。又有孩兒。華蓋二峯。名仙人臺。則在螺峯之西。怪石相承如臺。故云。山絕頂有二塔。獅子峯後數百步。有白雲洞。世傳張果老所居。又有龍井。而水簾在龍泉之上。垂二丈許。雖祁寒不凍。大旱禱輒應云。

十萬壘。○案原本十萬千。壘譌疊。據太平寰宇記改正。下倣此。

趙州平棘縣南五里。安濟橋南有壁壘曰十萬。今俗呼爲西壁營。昔漢安帝永初元年。以鄧騭任尙討羌無功。而後羌遂侵河內。趙魏民驚恐。北軍中候朱寵將五營兵屯孟

津。詔魏郡趙國常山中山繕作塢壘六百十有六所。此卽一也。今河羌人居之。

礪嵒山。

音礪

在柏鄉縣南。乃土山也。今屬順德路唐山縣境。卽古柏人也。礪嵒山出五色石。

真一泉。真定路府治。西街居民舍下有一井。極甘美。曰真一泉。金章宗嘗取惠山泉與此水較之。其味大勝。章宗因曰真一潤二。遂以名其泉云。

盧水。中山府城濠水流入城中爲盧水。水經注曰。盧奴城西北隅。有水困而不流。南北一百步。東西百有餘步。水黑色。俗名黑水池。或曰水黑曰盧。不流曰奴。故曰盧奴云。自原本缺一字至燕。皆引滏水入城。今水竇既毀。地道亦絕。惟池水流出城外。潭積微漲。滑滑東北流。注於滏水也。

涇邑縣故城。安喜東南五十里。本趙之涇城也。史記曰。田叔趙涇城人也。漢爲苦涇縣。屬中山國。章帝改漢昌。魏改魏昌。北齊廢。隋置隋昌。屬博陵郡。唐改唐昌。屬定州。天寶間。改涇邑。至宋康初。省入安喜。迄今爲墟市。民居甚衆。豪商大賈皆集焉。市衢之西。有西門豹之廟。此卽史記所謂陳餘游苦涇得富人公乘氏女所也。

新城在縣北三十里。曰新城鎮。卽古新市縣也。爲白狄鮮虞之國。漢爲中山屬縣。王莽曰平樂縣也。趙記曰。新市縣有蒯相如。廉頗。李牧三將之宅。故其城勢作三曲。西北避相如宅。東北避頗宅。東南避牧宅。又云。相如祖塋皆在城中。今爲新市鄉。新城鎮居民數百家爲墟市。十二月夜宿鎮上。蘇氏逆旅。是夜大雪。九門故城。黃氏族附。薊城縣西北三十里。荒城一區。秦戰國時趙邑。本有九室居之。武靈王改曰九門。史記

王出九門如野臺。以望齊中山之境。是也。惠文王二十八年。蔺相如城之。漢爲縣。今爲九門鎮。野臺在城側。俗呼爲寒臺云。城中世家。惟董氏一族。故自其龍虎衛上將軍俊。帥孤軍內附。滅金之役。戰死黃河之上。諡忠烈。其子文炳。忠獻公。受知世祖。身兼左轄。僉樞之職。討滅宋國。事載信史。次文用。爲翰林承旨。諡忠穆。次文忠。僉樞密院。諡忠貞。其孫士選。陝西平章。諡忠宣。子孫清顯。世罕及之者。內翰元文敏公明善。撰公家傳。曰。或曰。爲將三世。其後受其不祥。董氏貴顯四世。子孫數十百人。或曰。活一人者必有後。龍虎公志願公爲大將。不妄殺。殲死而生之者。無慮數十萬人。其語以是爲德。與後進臣上章。累請援史張功臣例。進封王爵。子孫辭不受。蓋以滿盈爲戒也。余嘗過其第中。見其冠蓋蟬聯。子弟皆清修好學。而有承平公子之風。觀乎此。清河元公之言。益可信矣。

南樂鄉城。千金渠附。

柏鄉縣南千山言山。二山之西也。俗呼爲南陵城。十三州志曰。昔陳公子完。避亂奔齊。

桓公以此封之。漢武帝封趙敬肅王子它爲南樂侯。卽王莽之富平也。杜氏傳曰。齊國夏伐晉。取樂。其後南徙。故曰南樂云。城西有千金渠。唐開元中。縣令王佐所浚。以疏積潦。其堰則謂之萬金堰也。

真定路之南門曰陽和。其門頗完固。上建樓櫓。以爲真定帑藏之巨盈庫也。上作雙門。而無棖桌。通過而已。左右挾二瓦市。優肆娼門。酒醺茶竈。豪商大賈。並集於此。大抵真定極爲繁麗者。蓋國朝興宋約同滅金。蔡城旣破。遂以土地歸宋。人民則國朝盡遷於北。故汴梁鄭州之人。多居真定。於是。有故都之遺風焉。蔡城縣西二十五里。故城東高臺三所。圯址尙存。郭況故臺也。今臺傍有三村落。一曰臺西。一曰故城。一曰內族。此卽郭后所居也。昔光武擊王郎至真定。過此。因納郭氏爲后。今臺三所。作南西北三面。北臺之上。建盧郎神廟。不知何神。廟東向。神像具唐服。民至今祀之。今真定平山縣東有綿蔓故城。卽光武所封。

況之侯國也。

安喜縣東南三十里。荒臺一所。曰雞鳴臺。世傳漢世祖自薊而南。於此舍宿。其地窪下。遂築此臺。雞鳴而發。因以名云。

趙州城中州衙南。皇華驛之東。有望漢臺。此卽東漢耿純所築。以望東武之所也。歲久摧圯。宋大觀四年。知軍州事劉戒。惜其遺跡淹沒。乃築而新之。其高七尋。其基延袤二百八十尺。上廣六十尺。仍構屋以覆之。命州判官趙徽之。撰望漢臺銘刻石。其碑今在州衙前。金刺史趙溫諤碑樓下。望漢臺但一荒丘耳。趙州城南平棘縣境。通津有大石橋。曰安濟。長虹高跨通衢。上分作三道。下爲環洞。兩塊復各爲兩洞。制作精偉。闌楯刻蹲獅。細巧奇絕。華表柱上。宋臣使金者刻題甚多。不能盡讀。有刻曰。連鵬舉使大金。至絕域。實居首選。宣和八年八月壬子題。橋上片石。有驅足跡四所。世傳神仙張果老之跡。或云當時匠者之戲。匠者曰李春。隋時人也。張果老列仙傳云。果真定蒲吾人。隱封龍山。唐高宗召不起。明皇迎入禁中。賜號通玄先生。後不知所終。今真定平山縣東十三里。有蒲吾古城。卽果老居也。

趙州城西門外。平棘縣境。有永通橋。俗謂之小石橋。方之南橋差小。而石工之制。華麗尤精。清淺二水。合流橋下。此則金明昌間。趙人裒錢而建也。建橋碑文。中憲大夫致仕王革撰。橋左復有小碣。刻橋之圖。金儒題詠。併刻於下。

李昉書院。

吟臺

附·元氏縣封龍山龍首峯下。有宋丞相李昉讀書堂及吟臺。皆在焉。李公書堂本三所。東溪

者爲浮屠所占。西溪蕪沒不可考。今建書院者。卽中溪也。吟臺在東北隅。疊石爲之。高三丈餘。宋碑一通尚在。逮國朝至元三年。李文正公治自翰林學士辭歸隱山中。因其故基以築大成殿。講堂齋舍。招延學者。王文忠公磐爲撰書院記。李文正公字仁卿。自號敬齋。云金進士。隸城人也。有文集行世。王文忠公字文炳。號鹿庵。廣平人。亦云金進士。入國朝爲翰林承旨。年九十二。以壽終。

徐童樹。在元氏縣封龍山。修真觀。四周多徐童樹。樹類梧桐。香氣時襲人。其子可以染碧。移植他所。則輒死。俗呼爲徐童華。世謂北嶽徐眞君登仙於此。記云。駱元素遇一老人。得藥十粒。且告曰。服此則不飢。吾本姓徐氏。字元英。新受長桑君牒。爲北嶽長史。言旣化童子。乘白雲而去。因以名云。

中山府學講堂前。有雪浪石。承以丈八芙蓉石盆。盆口鐫蘇文忠公雪浪石銘。其石紋作波濤痕。復有若臥牛立鳳之狀者。昔蘇公守定日。甚愛此石。構小室置之。榜曰雪浪齋。云西廡下一碑。圖石之形。并刻其銘於右。學中又有唐王維畫竹碑二通。一黑一白。世謂陰陽竹也。

玉華宮。在真定路城中衙城之北。潭園之東。是爲睿宗仁聖景襄皇帝之神御殿。奉安御容者也。外爲紅綽楔。垣牆四周。槐柳森列。重門棨戟。廣殿修廊。金碧輝映。宏壯華麗。擬於宮掖。制命羽流。崇奉香鑪。置衛士以守門闕。歲時月日。中書以故事奏聞。命集賢院臣代祀。函香致醴。遣太常雅樂。率燕南憲臣。眞定守臣。具朝服。備牲牢。行三獻之禮。延祐間。御史元永貞上疏略曰。聖朝建宗廟。崇孝享。可謂至矣。而睿宗神御。別在玉華宮。竊惟功德莫如太祖。世祖。不聞有原廟。世祖神御。奉安大聖壽萬安寺。歲時以家人禮祭。

供不用太常雅樂。今玉華宮又非龍興降誕之地。伏望朝廷照依京師諸寺影堂例。止命有司祭供。罷太常樂。斯得典禮之正矣。疏上不報。元統乙亥。監禮官薩都拉天錫有詩詠其事。詩曰。大禪天香出內宮。孝思與世總無窮。百年禮樂行三獻。一派簫韶超半空。使者領班雲氣裏。女仙搖佩月明中。小臣監禮陪清列。兩袖葵花映燭紅。天錫進士時爲燕南廉訪司照磨云。

開元寺在真定路城中鼓角門天祿坊西。此卽張五村故地也。寺內三門。石柱刻曰。大歷十二年。葺城主簿李宿撰。解惠寺三門樓贊云。後魏興和二年。建寺曰淨觀。至隋開皇十一年。改曰解惠。後復改開元寺。寺有千石鐘。聲聞數百里。今爲官府昏曉之警鐘。樓栱間有趙開閒所遺墨跡。正殿皆石闌環繞。鐫刻華木禽獸人物。極爲工緻纖巧。寺復有轉藏經碑。乃梁王承規集王右軍書也。妙絕當世。復有封居賦小篆千文碑在寺中。

臨濟寺在真定府城中定遠門東街飛雲樓之東。其三門下有唐吳道子所畫布袋和尚像。及搖鈴普化真讚。東坡墨竹綠筠軒詩等石刻。極爲精妙。寺乃臨濟祖庭。其靈塔則金世宗所建也。昔臨濟和尚結茅於此。嘗與木塔、河陽二師圍爐而坐。木塔曰。搖鈴普化。果是凡是聖。普化適至。揭簾而入。汝謂我是凡是聖。臨濟大喝一聲。普化作偈曰。河陽新婦子。木塔老婆禪。臨濟小厮兒。倒具一雙眼。世傳寺本趙王鎔所賜墨君和故宅也。

趙州城中東門內有柏林院。世呼爲趙州古佛道場。蓋唐末僧趙州和尚修行之所。舊在城外。後城既展。

而在東門內矣。院西丁字街有石浮圖。俗曰大石塔。高可四五丈。制作極工。上刻古薤葉篆亦妙。宋景祐五年。西廂人所建也。

中山府城中天寧寺後有小寺。世傳慕容垂之後宮也。其妃以誣被殺。冤血濺砌石。石白血殷。漬而不滅。每雨過。其色愈鮮。余嘗考北史。垂妃無它被殺者。惟段氏諫垂廢太子寶。垂不聽。寶深銜之。及卽位。令自殺。疑此卽段氏之血也。

變武子廟。藥城縣西四里。彪塚村高丘一所。曰變武臺。臺有廟。曰變武祠。此卽變伯書之廟也。書諡曰武。故云。廟西南有一塚。曰彪塚。俗傳武子獵於此。射一彪死。葬於此焉。

中山府文廟西。宋丞相魏忠獻王韓公琦祠堂存焉。琦爲帥。有惠政。州人爲立祠。祠下有碑一通。其略曰。仁宗朝。出知定州時。州兵不治。將爲亂。及至。卽用兵律裁之。察其橫不知教者。斬之。有死於戰敵者。賞其家。其孤兒繼衣廬。迺效古兵法。列方圓銳三陣。親教習之。由是定兵強勁可用。號稱雄鎮。聲振契丹云。真定路城中開元寺後繡女局內。唐清河郡王李寶臣紀功碑一通。其碑極高大。永泰二年立。類要云。李寶臣紀功二碑。一在真定府治東三十步。卽此碑也。一在府西一十步。大歷三年立。今在居民房屋土底。常有人掘見云。

真定路城中開元寺後繡女局內。復有鉅碑埋土中。止露碑首。長及丈五。題曰王武俊碑。貞觀五年立。文字皆不可考。類要云。王武俊碑。去真定府治東門二十步。卽此碑也。

眞定路南關陽和門外。史丞相遺愛碑一通。螭首龜趺。高四十尺。冠以華屋。壯麗崇峻。其文則郡教授吳時起撰也。碑略曰。公姓史氏。名天澤。大都永清人。國初嗣兄天倪爵。爲河北兵馬都元帥。尋除眞定等處五路萬戶。又擢經略宣撫使。世祖皇帝卽位。中統二年。超拜右丞相。至元元年。進光祿大夫。三年。進輔國上將軍。爲樞密副使。四年。復爲左丞相。六年。以榮祿大夫爲平章政事。八年。加開府儀同三司。平章軍國重事。中書左丞相。公出入將相。幾五十年。柱石四朝。儀表百辟。古之社稷臣也。其保障河北。戰三峯山。拊金椅宋。皆建奇功。嘗同巴延淮安忠武王統大軍至鄂渚。以疾召還。明年。薨於位。卽十二年二月七日也。享年七十二。贈太尉。諡忠武。葬眞定縣太保莊。墓碑翰林學士圖克坦公履撰。神道碑則翰林承旨王磐撰。皆敕賜文也。延祐六年。加贈推忠贊治同德佐運功臣。太師開府儀同三司。上柱國鎮陽王。初公之治眞定也。披荆棘。驅狐狸。開城郭。立官府。以招人民。成天下之劇郡。四方之都會。武仙之亂。公兄元帥天倪遇害。主將欲盡誅郡人以雪其恨。公恐失脅從罔治之義。忍忿含垢。亟諫數四。乃得全活。壬辰。招降老幼十萬餘口。將護北渡。使其自便處所。或使歸鄉里。一無所問。其德可勝言哉。公甲第今在子城西。黑軍營北。第中有靜治堂。青樾樓。景光亭。江漢堂云。十二月早渡滹沱河。抵陽和門外。日卓午矣。飯於旅舍。遂至南關。下馬讀其碑而去。

眞定路府學尊經閣下有劉法墨史圖石刻。及楊祕監邦基畫。及金諸賢詩。極精妙也。舊在墨史堂。今竄開壁云。

唐恆州刺史陶雲碑，在真定路府治廡下。有唐恆州刺史陶雲碑一通，字爲行草書，筆勢遒勁，而不著書者姓名。其文則唐中州錄事張義感所撰，其略曰：雲字大舉，河南伊闕人。高宗時爲恆州刺史，其碑則永淳三年立也。昔宋歐陽文忠公爲河北轉運使，至真定，見碑仆府門外，半埋土中，命工掘出，立於廡下云。三公神廟碑，白石神君、無極山二漢碑附三公神廟，在元氏縣西北三十里封龍山下，其廟兩兩相對，若秦階六符之狀。蓋三台近於軒轅，故廟於此山。今榜曰天台三公之廟。廟有漢封龍山頌碑一通，漢三公山碑一通，縣西故城，西門外八郡神壇，亦有三公山碑一通。漢光初四年，常山相馮巡所立，壇側又有唐三公山碑一通。八都者，總望八山而祭於此。明帝永平中幸此，詔復租稅六年，勞來縣吏，下及走卒，皆蒙恩賜。其後章帝北巡，又幸元氏，祀光武於縣堂，祀明帝於始生堂，皆奏樂焉。白石神君碑，無極山碑二漢刻，皆在封龍山下。

唐盧舍那珉像碑，鐵塔附元氏縣城中開元寺有唐蔡有鄰隸書盧舍那珉像一通。歐陽文忠公曰：唐世能名八分者四家，韓擇木、史維則、世傳頗多，而李潮及有鄰特爲難得。慶歷中，昭文韓公始得此本，有鄰小字尤佳。若石經藏讚、崔潭龜詩，與三代鼎彝何異也。又云：其碑石刻在中山府城中，蓋傳聞之誤耳。開元寺內西北院中有生鐵塔，高四五丈，其制亦機巧。

定武蘭亭石刻，舊在中山府庫中，爲天下名本。今埋沒不知所在。昔唐太宗詔供奉臨蘭亭，惟此本，乃率更令歐陽詢所搨也。上命刻石留禁中，以他本賜外臣。一時貴尚摹搨，惟禁中石本獨完善。至五代石敬

瑋棄中國而契丹耶律德光自中原輦寶貨圖書還北。至殺虎林而死。永康立。其國交兵。遂棄石而歸。慶歷中。李學究者得之。韓忠獻培始以墨木出示韓公。索其石觀。李遂瘞地中。李死。其子出石。始售於人。每本必千錢。由是好事稍稍得之。後李負官緡無償。時宋景文公祁守定武。以公帑金代李輸之。取石匣藏於庫。非故舊不得。熙寧間。薛師正守是邦。求者沓至。薛惡其摹打之聲。乃刻別本於外。以遺求者。然此郡已有二刻真贋矣。其子紹彭摹他石以易元刻。暗以自別。遂於古刻湍流帶左右五字。各刻損二筆爲記。或謂古蹟仰字如針眼。殊字如蟹爪。列字如丁形。又云。字微帶肉。此爲唐刻本也。大觀中。徽宗詔取此石於薛氏家。其子嗣昌進納御府。上命龔置宣和殿。靖康金人陷汴京。其石不知所存。云金以紅毯籠歸。今東南諸刻無能彷彿者。天台桑澤卿世昌編蘭亭博議一書。甚詳。

趙州城東北三十里平棘縣境。上古宋子城。城中有漢耿球碑一通。作漢隸書。蓋耿純宋子人也。城西有耿鄉漢光武封純爲侯國。世謂之宜安城。至今民多姓耿。皆純之後也。宋子故城。卽秦高漸離匿作宋子而歌之所也。按衛恆四體書勢曰。鉅鹿宋子城耿球碑師宜官書。袁術立球。純之後云。

徐整碑。在柏鄉縣西南七十里。柏鄉故城之西門內。漢柏人令徐君碑一通。君名整。桓帝時爲柏人令。有惠政。民懷之。爲立碑。此卽高祖動心不宿之地也。

柏鄉縣城中通衢居民檐下。柏鄉尉蘭君碑一通。君名儼。字望之。唐會昌間。尉柏鄉。有遺愛。民伐石立碑。潞州進士張瓌製文。將樹碑時。皇叔觀察使完顏從郁適朝京還。因題詩一章於碑後曰。卿材皆願識將。

軍。事簡將軍少出巡。白洒不沾誰犯禁。黃雞無禍得司晨。問者撫幼非干譽。止社停巫豈慢神。數尺去思碑上語。後官知勸可書紳。鄉人併刻其詩於碑後。

吉日癸巳石刻四字。周穆王所刻也。昔在趙州贊皇縣城南十三里壇山崖石之上。穆天子傳云。穆天子登贊皇山以望臨城。置壇此山。因以名焉。癸巳誌其日也。又有四望山者。謂穆王登山望祭四方者。傳中但云登山。而不言刻石。然字畫亦奇怪若杖畫狀。土人謂壇山爲馬蹬山。以其巳字之形類韁也。宋尙書廣平宋祁以皇祐四年秋自毫移鎮鎮陽。道出趙州。命人於壇山石壁模得此字。時趙之守將武臣也。遽命鑿山壁。釐其字歸趙。龕之廳壁。聞者莫不歎惋。嘉祐己亥。移置高邑縣廳壁。元至元二十三年乙酉。復移龕贊皇廟學之壁云。

藁城縣城中文廟內有漢藁長蔡湛碑一通。光和四年立。并碑陰全。廬陵歐陽文忠曰。天章閣待制楊敞嘗謂余言。漢時隸書在者。此最爲佳。敞自言平生學此字也。藁城縣九門城中有隋九門令鉗耳府君碑。不載書撰名。碑字首題云。大隋恆山郡九門令鉗耳清德之頌。君名徹。華陰朝邑人。本周王子晉之後。避地西戎。世爲君長。因以地爲姓。曾祖靜。魏馮翊太守。祖朗。成集二州刺史。父康。周荆安寧。鄧四州總管別駕。龍門二郡守。字畫遒勁。非歐虞不能及也。

九門城中有隋李康城清德頌碑一通。不著書撰名。氏文爲聲偶。而字畫奇古可愛。康隴西狄道人也。碑首題曰。大隋冠軍將軍大中都督恆州九門縣令隴西李君清德之頌。字多訛闕。其後曰十一年歲在辛

亥。大將軍在西。二月癸丑朔十二日甲子。建年上二字磨滅不可識。按隋開皇十一年歲在辛亥。其二字乃開皇也。大將軍在西之說。出於陰陽家。前史不載而見此。併記之。

藁城縣九門城西浮圖碑一通。題云。九門縣合鄉城人等爲國建浮圖之碑。唐應詔四科舉董行文撰文。清河傅節德書。唐高宗上元三年歲在丙子建。浮圖在智矩寺。寺今亦廢久矣。

馮樂陵。在新樂縣東北二十里。卽漢馮昭儀之墓也。昔昭儀隨其子中山孝王興就國。王爲母築宮於樂里。以居之。樂里卽今新樂城也。昭儀在元帝之時。有當熊之功。成帝優異之。賜御服鼓吹鹵簿。名其居曰樂里。旣終。勅葬樂里東北。因名其墓曰馮樂陵云。十二月原本缺二字早。自新樂縣起。午前至馮樂陵。午飯。遂至荒陵眺望而去。午後雪復大作。

漢中山王陵。安喜縣東唐河西北有二墳。卽漢中山哀王、憲王之陵。世訛爲二女陵。非也。哀王乃孝王之孫。康王之子。寰宇記曰。滹水又名唐河。自唐縣界流入。東注京邱。北對君子岸。岸上有哀王、憲王二陵。又聞中山懷王順王、夷王數陵。在安喜縣境內。今皆不可考矣。

李左車墓。趙州城西七里。清水之曲。有高塚一所。世傳爲李左車之墓。塚上今爲佛寺。中有一井可汲。餘無考者。塚上但有元魏景明二年所立兗州刺史李使君碑一通而已。

樂城縣西陲。有村曰陳居。陳餘墓在焉。此餘遊趙日所居。死歸葬此。

樂城縣城東石欄橋東二里。有塚極高。爲漢蒲關侯柴武之墓也。隋開皇間。武有遠孫爲浮屠氏曰英師。